

DBKL tawar 60 tempat Bazaría Wangsa Maju

Kuala Lumpur: Dewan Bandaraya Kuala Lumpur (DBKL) akan membuka peluang kepada peniaga baharu untuk mengisi 60 kekosongan yang masih ada di tapak Bazaría Wangsa Maju.

Ahli Parlimen Wangsa Maju, Datin Dr Tan Yee Kew, berkata ketika ini terdapat 60 kekosongan tapak baharu yang perlu diisi, sama ada oleh peniaga lama atau baharu.

Bagaimanapun, beliau berkata, peniaga lama tidak hadir pada tiga program undian dilakukan DBKL dan ia akan dibuka kepada orang lain yang berminat membuka tapak.

"DBKL sudah melakukan pengundian sebanyak tiga kali, tetapi ramai pihak tidak datang untuk menawarkan diri mengisi kekosongan itu.

"Saya tidak tahu mengapa mereka enggan datang, kemungkinan mereka ini takut atau ada sebab lain. DBKL ketika ini ada perancangan untuk membuka penempatan itu kepada peniaga baha-

ru," katanya.

Jelasnya, kebanyakan 150 individu membuat laporan polis terhadapnya bukan peniaga rasmi di tapak Uptown Danau Kota dan beliau meminta polis menyiasat mengenai laporan palsu dilaporkan mereka.

"Siasatan DBKL sudah dilakukan dan hanya sedikit didapati betul-betul peniaga di sana dan mereka ini tidak layak ke-

 **Peniaga lama tidak hadir pada tiga program undian dilakukan DBKL dan ia akan dibuka kepada orang lain yang berminat untuk membuka tapak.**

Tan Yee Kew,
Ahli Parlimen
Wangsa Maju

rana menyewakan tapak itu kepada pihak lain, selain tapak itu sebenarnya tidak wujud," katanya pada sidang media di Wangsa Maju, semalam.

Yee Kew turut mengakui, beliau bakal menyaman Presiden Pertubuhan Ikatan Usahawan Kecil dan Sederhana Malaysia (IKHLAS), Mohd Ridzuan Abdullah kerana dakwaan dilakukan terhadap dirinya disifatkan menghina dan berunsur fitnah.

"Saya terpaksa saman (Mohd Ridzuan) memandangkan tuduhan dinyatakan kepada saya adalah tidak benar, menghina dan fitnah," katanya.

Isu perpindahan tapak Uptown Danau Kota menjadi kontroversi dengan bantahan dilakukan individu yang mendakwa mereka peniaga yang tertindas dan minggu lalu, lebih 157 peniaga membuat laporan polis terhadap Yee Kew; Datuk Bandar Kuala Lumpur, Hisham Ahmad Dahlan dan Pengerusi Penjaja Bazaría Wangsa Maju, Ibrahim Merican.